

【發心畢竟二無別，如是二心先心難】（科註第一一〇五頁第二行）

《仁王護國般若波羅蜜經疏神寶記》：。謂初發心住與究竟即。雖分極異而證道則同（按：分極猶言分際，界限也）。故二不別。雖所證理一而初發匪易。故前心難。（發心住：分證即，依相似之觀力，而發真智，始斷一分之無明，而見佛性，開寶藏，顯真如，名為發心住。究竟即：道窮妙覺，種智俱圓，是為究竟即佛，此極果妙覺佛也。）

《淨名玄論》：故從始發心。終乎後念。皆習中道。恒觀不二。是故能入。

《中華佛教百科全書》：華嚴經：「初發心時，便成正覺，了達諸法真實之性，所有慧身不由他悟。」亦云：「初發心菩薩，得如來一身作無量身。」亦云：「初發心菩薩即是佛。」涅槃經云：「發心畢竟二不別，如是二心前心難。」大品經云：「須菩提！有菩薩摩訶薩，從初發心，即坐道場，轉正法輪，當知則是菩薩為如佛也。」法華經：「龍女所獻珠為證。」如是等經，皆明初心具足一切佛法，即是大品經中阿字門，即是法華經中為令眾生開佛知見，即是涅槃經中見佛性故住大涅槃。

【四種授記】（科註第一一〇五頁倒數第四行）

《佛學大辭典》：（名數）

一未發心而與授記，或有眾生往來五道，諸根猛利，好樂

大法，佛知是人自此過若干阿僧祇劫，發無上菩提心，又過若干阿僧祇劫修菩薩行，度無量眾生令住於菩提，又過若干阿僧祇劫成無上菩提，號字如是，國土如是，乃至滅後法住歲數如是等，是名未發心而與授記，是十位已前之種性地也。（種性地：即種性住：謂別教菩薩，於十住、十行位中，道種成就，無有退失，數數增進，故名。按：別教十住、十行位相當於圓教一信至九信位。）

二適發心已得授記，或有人久植德本，修習善行，勤心精進，諸根明利，是人發心，即住阿惟越地，入菩薩位，墮畢竟數，出過八難，如是等人適發心，諸佛即授當得作佛之記，是名適發心已得授記。是住行以上也。

三密授記，有菩薩求無上菩提，行種種之施，勤行精進，求諸善法，如是人固當授記，然自志滿足，恐不復更發精進之心，如不授記，復恐眾人生疑，謂此人精進修行，不蒙授記，是故佛以威神力密作當得作佛之授記，令他人聞，不令當人知，是曰隱覆授記或云密授記。

四現前授記，有菩薩久集善根，無不具足，常修梵行，觀無我空，於一切法得無生忍，佛知是人功德智慧已悉具足，則於一切大眾前現前記其成佛名號國土等，是名現前授記。見首楞嚴三昧經下。